



Uunga:
Juliane Henningsen
Inatsisartunut ilaasortaq

Imminut toquttoqartarnerata pinaveersaartinneqarnissaanut tunngatillugu § 37.1 naapertorlugu Inuit Ataqatigiit sinnerlugit Inatsisartunut ilaasortap Juliane Henningsenip apeqqutaanut 123/2014-imut akissut.

24-06-2014
Sullap nr.2014-100753
All. nr.1610190

Postboks1160
Tlf: 34 50 00
Fax: 34 55 05
3900 Nuuk

Email: pan@nanoq.gl
www.naalakkersuisut.gl

Inatsisartunut ilaasortaq apeqquteqaatai uku pillugit qutsavigaara:

1) Imminut toquttarnerup pinaveersimatinniarnanur Kalaallit Nunaanni 2013-2019-mut iliuusisslap ukiami oqallisigineqarnerani ulloq unnuarlu oqarasuaatikku attavigineqarsinnaasumik akeqanngitsumik ammatitaqarnissamut partiit tamarmik tapersersuinerat aallaavigalugu Naalakkersuisut 20. december 2013-imi akissutaat innersuutigalugu ajornartorsiut pillugu misissueqqissaarneq sukumiisoq pillugu killiffik apeqqutigerusuppara. Misissueqqissaarneq qanoq inerreqarpa ullorlu unnuarlu oqarasuaammik ammatitaqarneq pivaveersimatsiva iluaqutissartaqarpat?

2) Naalakkersuisut internetti atorlugu imminut toquttarnermut pinaveersimatitsinermi annerusunik iliuuseqarnialersaarnerlutik?

3) Apeqqutigerusuppara Naalakkersuisut inunnut imminoriarsimasunut inatsisitigit tunngaveqartumik katsorsarneqarnissamik pisinnaatitaaffeqarnermik eqquassinissamik eqqarsaateqarnerisut, tassa inuit imminoriarsimallutik peqqinnissaqarfimmiit aallunneqartut sapaatip akunnerata ataatsip iluani katsorsarneqarnissamik ikiorneqarnissamillu neqeroorfigineqarsinnaanngorlugit, aammalu piffissap aalajangersimasup iluani imminornissamik ulorianartorsiortut ikiorneqarnissaannik neqeroorfigineqarsinnaanngorlugit.

4) Imminut toqussimasunut imminoriarsimasunullu qanigisat tapersersorneqarnissaannut ikiorneqarnissaannullu neqeroorfigineqartarnissaat qanoq qulakkeerneqassava, Naalakkersuisullu qimataasut taperserneqarnissaannut qulakkeerisumik siunnersuutissaqarpat?

5) Nuna tamakkerlugu imminut toquttarnerup pinaveersimatinniarnanur atattillugu iliuusissiap piviusunngortinnissaanut killiffik qanoq isikkoqarpa, pineqartullu ilaanni piviusunngortitsinissamut pilersaarut malinneqanngitsoorpa?

Imm. 1-imut tunngatillugu: Ulloq unnuarlu akeqanngitsumik oqarasuaatikku attaveqarfigisinnaasap annertusaavigineqarnissaanik suliniuteqarneq aalajangiivigineqartinnagu, sukumiisumik misissuiffigineqarnissaa kissaatigineqartoq, Naalakkersuisut decembarip 20-anni 2013 akissuminni allapput. Peqqissuunissamik Periusissiami ilanngussa 5-imi piffissaliussatut pilersaarummi, 2015-imi nuna tamakkerlugu oqarasuaatikku siunnersuisarnerup sukumiisumik misissuiffigineqarnissaanut nukissanik illikartitsisoqarsimanera, taamaammallu sulii paasissutissanik pisarsisoqannginnera, Naalakkersuisut inhersuussutigaat.

Imm. 2-mut tunngatillugu: Kalaallit Nunaanni nuna tamakkerlugu imminut toquttoqartarnerata pinaveersaartinnissaanut 2013-imiit 2019-imut iliuusissatut siunniussat, imminut toquttoqartarnerata pinaveersaartinnissaanut tunngavissaapput pingaarnerit. Iliuusissatut siunniussami pinaveersaartitsinermut atatillugu iliuusissat tigussaasut arfineq marluk iliuuseqarfiginissaannut pilersaarusiulikkat taaneqarput. Imminut toquttoqartarnerata pinaveersaartinneqarnissaani internettip atorneqarnissaanut atatillugu tigussaasunik sulii pilersaaruteqanngilaq, Naalakkersuisulli siunnersuut pitsaasutut, iliuusissanillu pilersaarusionermermi pingaaruteqarpat, ilanngullugu eqqarsaataasinnaasutut isigaat.

Imm. 3-mut tunngatillugu: Peqqinnissaqarfimmi sulisut ilinniagaqassusertik tunngavigalugu imminut toqoriarsimasunik annertuumik nalinginnaasumik tapersesuipput. Imminut toqunnissamut navianartorsiortut ilaqutaasullu malittarineqarnissaannut suliarineqarnissaannullu tunngatillugu ataatsimut malittarisassaqaanngilaq. Peqqissaavinni napparsimmavinnilu, najukkami peqqissaavik pineqartoq tassanilu inuit sulisut sunik piginnaasallit aallaavigalugit, iliuuseqarnissamut/periusissanik pilersaaruteqartoqarpoq.

Malittarinnineq katsorsaanerlu peqqinnissaqarfimminnaq tutsinneqarsinnaanngilaq. Politiit kommunillu suliffeqarfutai qanimut suleqatigalugit tamanna pissaaq – soorluttaaq sumiiffinni arlalinni oqaluffik nukissatut pingaarutilittut ikiuuttartoq.

Tamani atuuppoq imminut toqoriartunut, timikkut ajoqusersimagaanni unitsinneqarluni nakorsarneqarnissamik neqeroortarneq. Tamatuma kingorna pisoq tamakkiisumik naliliivigineqartarpoq, oqaloqatigiittarnissallu neqeroorutaasarlutik.

Ilaqutaasunut tunngatillugu peqqinnissaqarfimmut attaveqarnermi qanoq innerat naliliivigineqartarpoq, taamatuttaaq oqaloqatigiinnerit pisariaqarpallu malittarinnineq neqeroorutaasarpur. Pisuni arlalinni malittarinninnissaq siunertaralugu inunnik isumaginnittoqarfik ilaqutariinnilluunniit sullissiviit attaviginerqartarput, amerlasuunilu politiit namminneq malittarinnittarlutik. Illoqarfiit ilaanni palasi qimagaasunik oqaloqateqarnermut atatillugu pingaarutilimmik inissisimavoq.

Iliuuseqarnissamut maleruagassiat ataatsimoorussat eqaassusilimmik naleqqussarsimasariaqarput, taamaasilluni najukkani assigiinngitsuni pissutsit inunnut isumalluutigisanut attaveqarnermi eqqarsaatigineqartariaqassammata. Naggasiullugu imminut toqunnissamut navianartorsiortunut aamma / imal. ilaqutaasunut iliuuseqarnermi, inunnik isumaginnittoqarfiup qanimut suleqatigineqarnissaa oqaatigineqassaaq.

Imm. 4-imut tunngatillugu: Siuliani oqaatigineqareersutut ilaqutaasunut tunngatillugu ullumikkut peqqinnissaqarfimmut attaveqarnermi qanoq innerat aamma naliliivigineqartarpoq, taamatuttaaq oqaloqatigiinnerit pisariaqarpallu malittarinninnerit neqeroorutaasinnaapput. Pisuni arlalinni inunnik isumaginnittoqarfik imal. ilaqutariinnik sullissiviit malittarinninniarluni attavigineqartarput, arlalippassuartiguttaaq politiit aamma malittarinnittarput. Illoqarfiit ilaanni qimagaasunik oqaloqateqarnermut atatillugu palasi aamma pingaarutilimmik inissisimavoq.

Qanigisaasut anigoruminaatsumik nalaataqarnikkut oqimaatsunik atugaqarneranni

ikiunissamat najukkami periarfissaqanngippat, tamip pissusaanik immikkut ilisimasalimmit ikiorseqqulluni qinnuteqarnissamat kommunit periarfissaqarput. Toqutsisoqarpat, imminut toquttoqarpat, ajunaarnerni annertuuni assigisaannilu anigoruminaatsumik nalaataqarnermi, pinasuartumik tarnikkut ikiorsisoqarsinnaavoq. Taama ikiorserneqarnissaq Ilaqutariinnermut Inatsisinillu atuutitsinermut Naalakkersuisoqarfik aqqutigalugu isumagineqartarpoq.

Qanigisaasut qimataasullu imminut toqunnissamat sanngiiffeqartut iliuseqarfigineqarnerisa patajaallisarnissaa Naalakkersuisut pingaartitaraat. Kalaallit Nunaanni nuna tamakkerlugu imminut toquttoqartarnerata pinaveersaartinnissaa pillugu 2013-imiit 2019-imut iliussissatut siunniussani, qanigisaasunut qimataasunullu siunnerfeqarnerulluni iliuseqarnissami iliussissanillu pilersaarusiormi qitiutinneqarput.

PAARISA-p atuakkamik ima qulequtsikkamik "Inuuneq inuuffigiuk" imminut toqunnikkut annaasaqarnermut tunngasumik saqqummersitseqqammenera, Naalakkersuisut ilisimatitsissutigisinnaavaat. Atuakkami inuit qulingiluat imminut toqunnikkut assigiinngitsutigut eqqugaasut oqaluttuartinneqarput. Atuakkami imminut toquttoqartarnerata nipangiusimajunnaarlugu, qanigisamik imminut toquttoqarnerani misigissutsit oqaasertalernerat qitiutinneqartut ilagaat. Atuakkap imminut toquttoqartarnerata paquminarunnaarnissaanut nipangiusimaneqarunnaarnissaanullu alloriarnerussasortaaq siunissamilu inuunernik annaaseqataasinnaanissaa neriuutigineqarpoq.

Imm. 5-imut tunngatillugu: Nuna tamakkerlugu imminut toquttoqartarneranik pinaveersaartitsinermut atatillugu iliussissatut siunniussat suli atuutilersinneqanngillat. Peqqissuunissamik Periusissiami – ilanngussaq 5-imi allassimasoq, 2014-ip iliussissatut siunniussanik pilersaarusiormiunissaa, 2015-ip 2016-illu atuutilersitsiviunissaat, Naalakkersuisunit innersuussutigineqarpoq.

Inussiarnersumik inuulluaqqusillunga


Steeh Lyngé